

四庫全書

集部

欽定四庫全書

文氏五家集卷五

明 文徵明 撰

太史詩集

五言律詩

春日閒詠

時節燒燈近，羈窮獨卧家。
餘寒春挾纈，殘困晚煎茶。
土潤先滋草，梅晴薄試花。
新年眠食好，隨分足生涯。

故園

屋舍小山村終然思故園雨晴秋倚閣月出夜開門好
景亦無改遠人空目存梅花未消息行矣晚何言

東葛城夜發

蕭蕭東葛路馬上聽嚴更月出高山黑天空遠水明年
光秋漸索客子夜猶行村落知何處時聞犬吠聲

北郭夜歸

北郭鍾初絕還家人倚舟縱橫燈映市突兀霧沈樓月

落羣星出天垂一水浮不知寒色重霜在木棉裘

十月

十月蹉跎盡嚴風忽滿城積寒裘失重綿雨榻生情人
事莽無際歲功垂又成凋零餘短菊殢眼得時明

暮春齋居即事三首

經旬寡人事蹤跡小牕前暝色連殘雨春寒宿野烟茗
杯眠起味書卷靜中緣零落梅枝瘦風吹更可憐

其二

閒庭青草積春半思蒼茫小雨作寒食微風汎海棠芳
情經病減白日廢書長何物供歌枕紫簾一炷香

其三

翠箔書重重寒深雨更濃碧鮮浮草色淺淡歛雲容未
遣愁欺病還資靜養慵蹉跎表褐在強半負春穠

江船對月效樂天何處難忘酒

何處難忘酒江船對月時風聲傳語笑波影散須眉遠
火山浮動明河天倒垂此時無一觥水月負佳期

遊治平寺

落日淹遊艇循山小徑迂避喧欣得寺擇勝旋開厨偃
樹斜侵磴橫岡遠帶湖過春纔十日碧蔭已扶疎

次韻陳以可觀蒔秧

妻孥空舍出秧稻及時明匝岸清歌動分畦翠浪生田
家自村樂歲事卜蛙聲慚媿城中客長腰飯玉杭

次韻喜雨

睡起風吹面高樓急雨來新涼花竹喜殘病鬱蒸開隔

水荒烟合長空獨鳥回佳人應按曲白苧是初裁

獨坐

獨坐茅簷靜澄懷道味長年光付書卷幽事續鑪香日出鳥鳥樂雨收花竹涼蕭閒習成懶不是寡迎將

夜坐

溽暑夜不寐涼風初解圍起看星漢動坐久語音稀殘月耿猶在流螢忽自飛一聲何處鶴露下欲沾衣

不寐

展枕不得寐沈沈玉漏淹一燈寒照壁半夜雨鳴簷有味留貧在多愁與病兼髻邊新白髮應為小詩添

新寒

木落見清真端居物自春
牕虛蠅擊紙院靜鳥窺人
白日經簷短青衫卒歲貧
新寒滿城郭欲出畏風塵

新年

擾擾復闐闐雞聲妨晏眠
江城收宿雨衰髮受新年
寒盡梅花後春生草閣前
郊原芳事近早問石湖船

對雨

獨吟池上雨拍拍水平堤暝色千峯合涼聲萬葉齊翠
承深竹重寒壓晚簷低怪得經過斷街頭一尺泥

題秋江圖

湖平失洲渚日落見帆檣雁影天隨遠漁歌水自長孤
雲開浩蕩高興落滄浪欲采芙蓉去烟波正渺茫

次韻孫太初秋夜汎月之作

烟歛依依樹鷗飛漠漠田短簫吹夜月高興落江天遠

火搖輕浪跳魚驚過船良辰不易得吾敢卜明年

秋晚

白日銷殘篆西風薄總幃文園無奈病衣帶不勝圍墮
葉兼零雨斜光暗夕扉天涯鴻雁疾誰念稻梁微

九日不出

早衰憐暮景時序每侵尋秋色籬花瘦柴門落葉深索
居成病懶勝日負登臨樽酒正愁絕南樓急暮砧

重葺先廬履仁有詩奉答一首

基構百年謀依然四壁秋庭陰分柳色簷影帶雲流客
到從題鳳余生本類鳩稍令供燕祭此外復何求

再答一首

未遂入山居聊營背郭廬編茅蔭衡宇垂柳帶清渠陋
襲先人志慙淹長者車北牕有涼吹卧展架頭書

立春日遲陳淳不至

東風吹綵燕曉色動簾旌遲子不時至南樓春自生裁
詩供帖子閣酒聽啼鶯白日流雲暖梅花初雪晴

西虹橋晚眺同九遠賦

從來佳麗地閭闔更雄華
大舶浮江下飛樓帶郭斜
春旗搖落日暮堞倚晴霞
天外疎烟合蘭橋入望賒

夏日簡履約

王子清虛甚蕭閒味道腴
焚香供燕寢閉閣讀殘書
適俗無塵韻還山有竹居
遙應苦喧雜伏日興何如

王婆墩次楊儀部韻

遙看塢一聚到只屋三間
嫗姓隨墩在僧廊得蘚殷
秋

濃山照閣雨足水侵關依舊刺船去回瞻樹杪欄

過孫文貴不在對庭中新竹

一室才容膝居然不受埃恍如城郭外時有野人來簷
綠搖新竹階紋蝕古苔未妨酬對寡撫景自徘徊

東禪寺

古寺謝車馬清臨綠玉灣雙禽啼竹逕獨犬護松關落
葉秋滿地夕陽僧自閒偶來還自去回首碧天間

石湖作

落日淡烟消平湖碧玉搖秋生茶磨嶼人在越城橋樹
色晴洲斷鐘聲古寺遙西風吹短髻還上木蘭橈

寒夜

茆屋寒初重無眠對燭光疎砧何處月殘葉滿庭霜攬
物驚時改供愁有夜長空餘強學志撫卷視茫茫

張明遠索畫久而未成歲暮陰寒雪霰將集齋居
無聊為寫溪山欲雪圖并賦短句

歲暮天欲雪郊原風色饒山寒增突兀樹暝入蕭條野

水照茅屋歸人爭斷橋牕前有新句欲覓已寥寥

承天寺中隱堂

古徑無車馬閒門帶鶯蘿秋風吹宿雨日暮眄庭柯世
味逢僧盡新涼入寺多居山未有計此地數來過

雨中雜述四首

春歸楊柳暗四月雨垂垂紅洗花無迹青沾草有私倚
樓迷曉望出郭滯幽期客去茶甌歇閒愁總上眉

其二

凝情不自得看雨獨登樓綠樹千門晚涼雲五月秋暗
梁栖濕燕高壁上枯牛有待新波長南湖弄小舟

其三

雨從四月晦數日尚愆晴潤與黃梅併寒侵白苧生斷
烟迷竹色懸溜雜雞鳴莫自嫌行潦東郊久待耕

其四

十月江城雨霖淞勢已滔簷端宿雲霧屋脚卷波濤已
掃蘇端迹仍深仲蔚蒿無錢供晚醉行凝質春袍

歲暮齋居

陋巷還車馬高齋漫編塵埃銷短日雨雪入殘年攬
照空雙髻探囊有一錢西風灑脩竹吾意已蕭然

南樓二首

南樓冰雪盡江郭歲年窮暮嶺延西日枯條振北風孤
雲天一握萬事髣雙蓬徙倚青烟滅蕭條在眼中

其二

西山開晚霽返照落牕中歲事收殘雪生涯入斷鴻寒

多裘失重愁劇酒無功零落雙桐樹蕭蕭不受風

登上方

春風吹白髮醉上碧岩堯帆落天邊雨人行樹裏橋舞
臺青草合霸氣白烟消吳越橫分地登臨不自聊

陳以可近歲築室陳湖專理農業時以詩見寄誇
其所得比來秋成當益樂輒賦秋晚田家樂事十
首寄之

築室姚江上陳湖東復東舊諳風俗厚近喜歲年豐晚

醉茅柴酒朝羹踏地菰村居今已習那復念城中

其二

甲第城中好何如小隱家翦茅苫屋角引蔓東籬笆社
動喧村鼓場乾響稻枷誰言田舍苦隨分有年華

其三

艇子新浮水移來傍釣磯新晴觀穫去薄暮汎湖歸斜
日牛眠隴秋風犬護扉行邊衝鴨陣時掠野田飛

其四

秋雨初晴後秋風滿稻畦
笑歌村遠近烟火舍東西
紫擘輸芒屨黃烹啄黍雞
相過有田父日日醉如泥

其五

秋事相將盡農勤亦告終
風高陂水涸霜落稻畦空
說尹遭田父穰年賽社公
不妨多釀秫今歲頗豐融

其六

散步蒲為屨端居衲御風
觀儼逐鄰里築圃課兒童
誰識佳公子真成田舍翁
只應吟興在時復走詩筒

其七

早畢婚嫁累便為田舍謀水租魚十頃園戶竹千頭省
事官無擾勤身歲有秋有時攜短策尋壑更經丘

其八

日落山圍屋霜清水映門魚蝦時作市雞犬自成村新
味香杭飯常情老瓦盆渾家得醉飽時事更休論

其九

廩充官稅足歲晏樂何如自和田園詠閒修種樹書清

溪照茆屋寒雨暗村墟時有東鄰叟攜壺慰索居

其十

湖田半栽秫秋至釀先成早辦兼旬醉聊償一歲耕淵
明無俗韻子幼善秦聲莫怪疎狂甚相歡答太平

虎丘千頃雲閣

閣外雲千頃風前首重搔倚闌雙鳥下落日亂山高積
水連橫浦疎松帶遠臯冷然發清嘯吾意欲凌囂

賦併梅

斷枝黏碧蘚殘蕊疊冰紈未乏溪山韻尤宜几格看移
燈傳壁影垂箔護春寒應斷西湖夢東風在席端

賦盆蘭

清真寒谷秀幽獨野人心結意清霞佩傳情綠綺琴德
馨堪自近道味許誰深一笑歌璫樹春風雪滿襟

關川八詠

關川幽居

有美神明後關川古世家人情隨里善第宅帶山斜高

木雨添陰清流月映沙莫憐城市好車馬正紛華

唐關清隱

空巖帶流水回合自成關有客居盤谷何時賦小山編
籬護脩竹引釣俯蒼灣見說遺塵累春來事事閒

墓山牧笛

何處聞悲調隴頭孤笛鳴月明人跨犢風細谷傳聲鬱
鬱佳城思漫漫長夜情孤兒正愁絕原樹答淒清

規山漁歌

短棹白蘋渚清歌黃帽郎隔雲傳欸乃背雨入滄浪日
落暮山碧天空烟水長西風吹不散秋色滿江鄉

隔峰嵐氣

隔峰當戶牖嵐氣掃晴空短笏迎蕭爽疎簾捲鬱葱晚
烟明滅外秋色有無中莫道渾如畫還應畫未工

屏阜書聲

吾伊聲不惡宛轉出崇岡茆屋四簷靜短檠中夜涼能
來問字客雅稱育賢鄉清韻松篁外悠然道味長

雙溪明月

見說雙溪好秋來更渺然
漫流寒漾月夜色遠浮天
斗酒黃泥坂宮袍采石船
謫仙今寂寞勝事屬誰傳

萬貫晴川

江上春潮落晴洲帶渺茫
中流分樹色斜日送蘋香
斷雁迷千里荒雞自一鄉
晚雲歸別浦依約見帆樯

追和錢舜舉山居韻

翠深山帶屋綠淨水通門
泉石情還重丘園道自尊
種

莎添野色留竹護籬根樂事惟心會休逢俗子論

雨宿武城追和先温州夜宿武城二首

長河風雨送盡日傍滄洲白浪灘都没青楓葉亂流百
憂雙短髻千里一孤舟日暮墟烟合荒寒滿舵樓

其二

經過言偃邑非復昔時城里俗無從問絃歌空有名江
湖孤燕斷風雨亂雞鳴酒醒青燈暗春寒一夜生

紫氣

紫氣龍顏穆彤墀虎衛森萬年占帝運一念格天心日
月何虧食華夷仰照臨誰應知有喜白首忝詞林

頌歷

鳳歷從天下千官列陞前青陽壺史奏黃帕侍中傳周
禮存頒朔堯書重紀年白頭供奉裏慚媿得春先

旅懷

陰凝冰未泮雪盡歲還窮世事浮榮外生涯久病中心
旌搖落日天影度冥鴻短髮垂垂白那堪犯朔風

野行因過廢寺

久客念搖落行行還寂寥
餘寒棲短褐斜日帶荒寮
歲事行將盡羈魂黯欲銷
雲房才咫尺便覺遠塵囂

才伯過訪

落日生愁地窮陰欲雪天
歸心聞斷雁衰髻逼殘年
光景陳編裏情懷薄酒邊
平生黃叔度相見即欣然

對酒

晚得酒中趣三杯時暢然
難忘是花下何物勝樽前世

事有千變人生無百年還應騎馬客輸我北牕眠

觀書

老眼視茫然時時手一編未能忘習氣聊復遣餘年
欹枕山牕下篝燈細雨邊誰應知此味自結靜中緣

煮茶

絹封陽羨月瓦缶惠山泉至味心難忘閑情手自煎
地爐殘雪後禪榻晚風前為問貧陶穀何如病玉川

晏起

林下將迎寡頽然萬事捐老知閑有益病與嬾相便殘
夢荒雞外輕寒總帳前從教貧到骨不負日高眠

梁溪道中夜行

雨餘新水漫風外一帆輕山繞湖南去人從畫裏行天
空雲樹渺月出暮潮平煙靄知何處漁歌時一聲

石湖春遊

湖光披素練野色漲青烟一雨樹如沐千林花欲然疎
鐘白蓮社新水木蘭船行樂須春早山頭有杜鵑

四月二首

風雨將春去清和四月天
桐陰搖白日草色散青烟
興寄琴樽外筋骸杖履前
若為消永晝牕下有殘編

其二

春雨綠陰肥雨晴春亦歸
花殘鶯獨轉草長燕交飛
香簾青繒扇筠牕白葛衣
拋書尋午枕新暖夢依微

五月

逕草侵衫色庭梧生晝陰
時光臨角黍穡事望梅霖
習

靜鑪熏細醒煩茗椀深草堂賓客散欹枕聽幽禽

夜坐

涼聲傳漏點夜色轉樓陰遙漢三星度空庭萬籟沉草
輝螢箇箇樹影月林林稍覺塵氛遠閒愁不上心

夏日

境寂晝偏永心清暑氣微老兼疎筆研性復懶裳衣隱
几雙桐轉褰簾獨鳥飛茗薰聊自適不怪客來稀

待月

夜色動虛楹南樓遲月生碧烟消欲盡銀漢寂無聲
瀲金波湧參差玉樹明隔溪人未卧把酒坐吹笙

和陳魯南二色菊

秋色一籬雨寒英百翦霜宮粧嬌映額后服淡生香
燦爛蹀躞重襪毵鵲羽長西風不相負歲歲有重陽

右黃菊

閒淡歲寒姿金行自及時月明霜翦翦秋淨玉差差
短翅蝶迷粉脩翎鶴有儀瑤華誰與賦寂寞自東籬

右白菊

射瀆早行二首

夜色載扁舟
滄江帶月流
櫓聲撩吠犬
燈影觸眠鷗
星漢疑搖動
煙林遠欲浮
不知霜併下
寒重木棉裘

其二

長林風策策
孤棹夜暝暝
天濶水烟白
月寒漁火青
素衣沾墜露
短髮戴疎星
彼美誰家子
吹簫下遠汀

石湖汎月

愛此陂塘靜扁舟夜不歸水兼天一色秋與月爭輝浦
近青山隱沙明白鷺飛坐來風滿髻不覺露沾衣

迎春日風雨齋居漫述二首

迎春春欲至風雨暮交加未說迷牛馬真成濕歲華林
無霜後葉梅有臘前花客散虛齋寂風簷自煮茶

其二

風雨餞殘臘梅花迎早春病淹愁緒在髻與物華新短
褐栖餘冷重簾細暗塵不嫌門寂寞時有問奇人

文氏五家集卷五

欽定四庫全書

文氏五家集卷六

明 文徵明 撰

太史詩集

七言律詩

謁江浦莊先生留宿定山草堂

十畝青松四面山
草堂宛轉亂流間
若非清福安能主
為訪高人得暫閒
竹圃眠雲秋濯濯
水舂孤枕夜潺潺

就中何事尤堪羨國是人非了不關

重至滁州同諸友遊琅琊

兼旬行李滯滁州不到琅琊亦枉留
飲伴況來多舊好山靈應不厭重遊
四時風景初無恙千里登臨易起愁
安得移家終此住讀書朝暮對溪流

再至定山辱莊先生贈詩次韻奉答

緝齒窮身豈有知偶陪高論得移時
感公不以愚頑棄顧我何堪遠大期
草閣便須終歲住僕人休訝出山遲

歸來乞得堯夫句暮雨秋燈不斷思

附錄莊公贈詩

一燈何處寫相知對坐寒牕暮雨時詩本平生非杜甫
琴才臨老遇鍾期儘堪出手名家早但覺忘年得友遲
儻許無言真妙意欲將千載慰深思

暮春

高榆風定翠相圍天氣悠揚思轉微晝閣凝香新試扇
春肌生汗欲更衣乍聞幽鳥渾無見時墮遊絲忽漫飛

惆悵東園尋曉夢落花芳草已都非

奉次吳匏菴先生續潘邠老詩韻

滿城風雨近重陽暝色寒聲漫繞堂
向去陰晴難逆料邇來牢落已粗嘗
直饒詩思如秋淡未害臞顏映菊黃
好事例乖何用歎但令有蟹薦桑郎

田舍

秋風田舍有閒情野老迎賓喜不勝
小徑穿松敷細石短籬緣水束枯藤
堆盤蝦蟹輸村樂匝屋雞豚驗歲登

却戀城居留未得晚山回首白烟凝

詠芙蓉

九月霜清卉草荒拒霜池上獨宜霜誰憐憔悴春無主
賴是遲迴晚自芳太液風烟情黯黯仙人城闕事茫茫
幽貞自有金莖菊相對疎籬各淡粧

十月

江南十月乍風埃簾箔垂寒晝不開身計蕭蕭存斷簡
人情黯黯付深杯雨中秋事芙蓉盡霜後時新橘柚來

抱病經旬賓客減卧看香鼎篆縈迴

停雲館燕坐有懷昌國

山館無人午篆殘便閑經日不簪冠時憑茗椀驅沈困
聊有書編適燕歡漠漠黃梅生濕潤纖纖白苧試輕單
梧桐小砌陰如許不得君來共倚欄

與邢麗文登葑門城樓

天風異制木蛇空雉堞差差夕照中百里山川形勝舊
萬家烟火歲年豐迤南茂苑迷陳跡直北荒原識故宮

會取千年興廢理與君極目送飛鴻

次韻答希哲見懷兼乞草書

牆外車音寂不聞閒緣誰解病中紛涼風著急吹芳樹
落日含情詠碧雲高誼乍違黃叔度清篇先枉沈休文
秋來定有臨池興榻得鵝羣倘見分

懷錢孔周徐昌國

時應試南京

停雲寂寞病中身旅夢秦淮夜夜新見說踏槐隨舉子
終期鳴鹿薦嘉賓人言漫漶真無據吾道逶迤合有伸

想見馬蹄輕疾處薄羅微染帝京塵

叔父侍御致仕詩二首

聖恩剛遂我公私乞與閒身未老時行樂擬裁居士服
入山誰送草堂貧浮雲多態何當散高鳥無求不可羈
明月青山一杯酒閒情未許俗人知

其二

詔許先生解舊官依然多繡賁丘園孤危宜負平生志
歸宿還叨曠蕩恩誰謂今人無古道欣看盛事出家門

從今只辦溪山樂世事如棋不足論

奉陪呂太常沈石田遊虎丘次韻

高賢尋壑共經丘偶得追從續舊遊
陸羽泉甘春試茗
王珣祠古暮維舟
風簷落落鈴相語
雨徑登登屐似油
怪是酣吟留不去
水雲千頃正當樓

金陵客樓與陳淳夜話

卷書零亂筆縱橫
對坐寒牕夜二更
奕世通家叨父行
十年知己愧門生
高樓酒醒燈前雨
旅榻秋深病裏情

最是世心忘不得滿頭塵土說功名

立春日病起

十二月廿三日

青絲裹餅薦春盤喜見鞭春在臘前便與一冬除舊病
尚餘七日殘年梅花消息嚴寒後綵勝情懷薄酒邊
旋取物華供帖子暖痕浮綠草生烟

初六日與客自葑門汎舟至東禪小集

淺痕霏綠淡烟光遠樹依依春水長落日五人浮野艇

東城三里到溪堂

寺有青溪堂

餘寒人日梅枝瘦半醉僧寮

菜飯香轉信投閒閒不得題詩還博靜中忙

人日停雲館小集

新年便覺景光遲猶有餘寒宿啟帷寂寞一杯人日雨
風流千載草堂詩花枝未動臨佳節菜飯相淹亦勝期
春色到今深幾許小山南畔草痕知

詠孔周

圍坐清談麈尾長墨痕狼籍練裙香水亭紈扇歌楊柳
春院琵琶醉海棠王謝風流才子弟齊梁煙月錦篇章

豪華豈是泥沙物好在揮毫白玉堂

春日舟行書所見

日出吳山歛霧蒼平繞十里下橫塘弄春草色偏宜遠
繞竹溪流不覺長一塢人烟自花柳千畦麥菜間青黃
不因出郭供人事負却風光二月強

重陽前一日飲孔周有斐堂

塵土欺人兩月忙深秋才上故人堂却憐違濶翻情厚
不覺淹留入話長翠箔香風吹桂子布袍寒信作重陽

百年辛苦還防死，好對良辰盡此觴。

鄭太吉送慧泉試吳大本寄茶

醉思雪乳不能眠，活火砂瓶夜自煎。
白絹旋開陽羨月，竹符新汲慧山泉。
地鑪殘雪貧陶穀，破屋清風病玉川。
莫道年來塵滿腹，小窓寒夢已醒然。

歲暮齋居即事

簷樹扶蘇帶亂鴉，蕭齋只似野人家。
紙牕獵獵風生竹，土盎浮浮火宿茶。
日色射雲時弄彩，雨絲吹雪不成花。

庭中卉物凋零盡獨有蒼松領歲華

謝永嘉趙君澤寄蘭

草堂安得有琳琅傍案猗蘭奕葉光
千里故人勞解珮一牕幽意自生香
夢回涼月甌江遠思入秋風楚畹長
漸久不聞餘冽在始知身境兩相忘

金陵詠懷

鍾山日上紫烟收金闕參差萬瓦流
帝業千年浮王氣都城百雉隱高秋
聲華誰覓烏衣巷形勝空吟白鷺洲

回首壯遊心未已西風策馬看吳鉤

詠玉蘭花

孤根疑自木蘭堂怪得人呼作女郎繞砌春風憐謝傅
一天明月夢唐昌冷魂未放清香淺深院誰窺縞袂長
漫說辛夷有瓜葛後開應是愧穠粧

此花以辛夷接本

賀九嶺

相傳為吳王賀重九處

截然飛嶺帶晴嵐路出餘杭更繞南往跡漫傳人賀九
勝遊剛愛月當三巖前鹿繞雲為路木末僧依石作菴

一笑停輿風拂面松花閒看落璣璣

三月

三月江南柳色勻海棠風暖駐游塵山齋病起詩逋積
曲巷春晴轍跡新習氣未忘聊應世虛名何益漫勞人
閒來自理幽居事莫道花時不稱貧

李咸用詩袁世難行道花時不稱貧

遊吳氏東莊題贈嗣業

渺然城郭見江鄉十里清陰護草堂知樂漫追池上跡
振衣還上竹邊岡

中有知樂亭振衣岡

東郊春色初啼鳥前輩風

流幾夕陽有約明朝汎新水菱濠堪著野人航

詩人孫太初過訪

把劍南來賦遠遊又看東上浙江舟山齋動是經時別
菜飯聊看半日留醉裏江湖真有味春來花鳥正關愁
天台雁蕩平生夢憑仗詩囊次第收

暮春雨後陳以鈞邀遊石湖遂登治平

貪看粼粼水拍堤扁舟忽在跨塘西千山雨過青猶滴
四月尋春綠已齊湖上未忘經歲約竹間覓得舊時題

晚烟十里歸城路不是桃源也自迷

次韻王秉之新莊書事

背郭通村小築居任心還往樂何如山中舊業千頭橘
水面新租十畝魚未遂隱謀聊避俗不忘壯志有藏書
抱衾曾借西齋榻回首題詩十載餘

與宜興吳祖貽夜話有作就簡李宗淵杭道卿吳
克學

有客扁舟自陽羨夜堂風雨對高眠不辭談笑成佳會

祇覺淹留有宿緣別後交遊如夢裏意中山水落樽前
青燈酒醒還生戀明日烟波更渺然

寄陳以可乞米

秋風百里夢姚城無限閒愁集短檠零落交遊懷鮑叔
逡巡書帖媿真卿謀身宜信貧難忍食指其如累不輕
見說湖南風物好何時去買薄田耕

宿相城有懷石田先生

何處重占處士星草堂突兀夜燈明風流已與人都盡

手澤空憐物有情依舊短牆圍野色不禁高樹送秋聲
傷心未了生前約漁子沙頭一棹橫

金陵秋夜與彭寅之湯子重步月

雙闕深沈夜向闌碧天露下葛衣單風吹急柝嚴城閉
月照行人古道寒往事悠悠歌鳳去青山靡靡識龍蟠
壯懷萬里同遊在滿目風烟引劍看

道復西齋古石

玲瓏蒼壁太湖姿浪蝕沙陶面面奇百穴晴牕通玉女

一拳小石夢仇池乍逢合下南宮拜欲咏還輸白傅詞
便擬高齋題列岫朝來秀色滿檐帷

新正四日雪後方崑山思道過訪值余不在留詩
而去奉答一首

偶扶藜杖出柴荆虛却王猷過訪情高興自緣脩竹住
通家還許小兒迎百年契分叨君厚一笑閒緣媿我輕
留得新詩珠滿案紙牕殘雪共光榮

楊儀部君謙纂述之餘頗修淨業瞻對無由悵然

成詠

不見高人動經月似聞觀道獨澄懷一函自課維摩品
百日方持白傳齋春到梅花開小閣夢回涼月印空階
從知不受風塵累二十年前已乞骸

子重賦詩徵余逋畫未即踐言先以小幅展限就
和來押

飛嵐疊巘翠撐空畫得幽居似剡中滿地清陰山木合
隔溪野色小橋通倚闌詩思蕭蕭雨繞竹茶烟細細風

想得高人方閉戶那知市上軟塵紅

夏意

五月江南櫻筍殘
疎花吹盡綠漫漫
雨來恰及梅黃候
春去猶餘麥秀寒
白日幽深茆屋靜
野情蕭散竹袍寬
美人何處經時別
滿耳新蟬獨倚闌

次韻九逵山中步月

黃葉蕭蕭沒斷踪
風將牢落入窮冬
三更酒醒人何處
千里月明山自重
遠水浮村微見火
碧烟藏寺但聞鐘

金匱要略卷六
知君逸思難分付都屬尋詩七尺節

虎丘劍池

吳王埋玉幾千年水落池空得墓磚地下誰曾求寶劍
眼中吾已見桑田金鳧寂寞隨塵劫石闕分明有洞天
安得元之論往事滿山寒日散蒼烟

石湖

橫塘西下水如油拂岸垂楊翠欲流落日誰歌桃葉渡
涼風徐度藕花洲蕭然白雨醒煩暑無賴春山破晚愁

滿目烟波情不極遊人還上木蘭舟

席上題扇景壽外舅大參吳公

解組歸來歲五更天教閒散養脩齡東華風浪今無夢
南極休徵已見星閱世儘容醒眼白倚樓自愛晚山青
扁舟或獻南飛曲憑仗東坡醉裏聽

雞鳴山金陵勝處往歲葢屢遊之未有作也偶閱
九遠遊憑虛閣記追賦一首

金陵佳麗石頭城傑閣登臨正雨晴帝業稱雄維虎踞

遊人選勝得雞鳴
長江天際孤帆滅
落日煙中萬瓦明
滿目廢興題不得
獨看名畫繞廊行

與外甥陸之箕夜話

安甫子

一笑燈前覩陸雲
後生殊是逼吾頻
文章有待成先志
眉目分明見故人
潘岳任咸千載恨
何充王導一家親
虛齋短榻寒相對
禮數雖疎意却真

上巳日獨行溪上有懷九遠

郭外青烟柳帶柔
洞庭西去水悠悠
故人不見沙棠楫

燕子齊飛杜若洲
日落晚風吹宿酒
天寒江草喚新愁
佳期寂寞春如許
辜負山花插滿頭

寒食自橫金歸汎石湖

澤國春深霧雨收
越城橋畔水爭流
斷煙西去浮蒼嶼
斜日中川起白鷗
村店寂寥寒食節
行人迢遞木蘭舟
芳晴滿目東風急
欲採汀花不自由

侍柱國王先生西園游集

園在夏駕湖上

名園詰曲帶城闌
積水居然見遠津
夏駕千年空往迹

午橋今日屬閑人江南白苧迎新暑雨後孤花殿晚春
自古會心非在遠等閒魚鳥便相親

附王先生次韻

吳王消夏有殘闌特起幽亭謝要津曲徑轉時迷到客
短牆缺處見行人綠楊動影魚吹日紅藥留香蝶送春
為問午橋閒相國自非劉白更誰親

百花菴

北郭名藍舊有名歲長無復百花深柴門日落空流水

古木春來長綠陰
滿眼風流文字業
一龕荒寂道人心
野橋詰曲通幽徑
短策何時許重尋

詠庭前蓼菊

寒英翦翦弄輕黃
百卉凋零見此芳
天意也應憐晚節
秋光端不負重陽
郊原慘淡風吹日
籬落蕭條夜有霜
輸與陶翁能領略
南山在眼酒盈觴

賦得野亭秋興

斷雲狼籍近簾櫳
天地蕭條四壁空
盡日倚闌黃葉雨

一番吹鬢白蘋風年光搔首孤鴻外山色供愁落照中
欲寄閒情無那遠烟波江上採芙蓉

贈王履約履吉兄弟

春風觸目總琳琅素月流雲縹緲光未用寡辭推子敬
故應相敵有元方百年有待麟呈瑞千里欣看雁逐行
手結幽蘭成雜珮思君欲贈不能將

揚州

竹西簫管玉參差柳外樓臺舞陸離落日蕪城非故國

春風后土有荒祠錦帆煙月千年夢禪榻情懷兩鬢絲
二十四橋何處是扁舟西去不勝思

先大父有宿汶上之作舟中閱先集敬次嚴韻

日暮風霾欲漲天獨臨古渡意悽然春光三月行當暇
客子長途未息肩白漫河流還岸岸綠垂楊柳自芊芊
當年汶上城何處一抹斜陽萬樹烟

過張秋追懷武功先生遺跡

投薪沈鐵事悠悠巨掃千尋壓上游河濟從來天下盡

金匱要略卷六
江准今入地中流當時物論輕文士千載行人仰壯猷
人事幾回桑海異依然高碣鎮東州

魏家灣有感

博平縣地也

博平縣裏侍親時四十年来兩鬢絲竹馬都非前日夢
枯魚空負此生悲已無父老談遺事獨有聲名繫去思
憔悴平生塵土跡魏家灣水會能知

柳色

漫說鶯兒色似油何如楊柳綠幽幽初收宿雨濃於染

遠映新波翠欲流
十里蟬聲溪上路
一痕斜照驛邊樓
莫言濯濯無人愛
別有春光在御溝

懷石湖寄吳中諸友

江梅千樹繞楞伽
記得臨行盡著花
青子熟時應憶我
綠陰成處正思家
聽鶯此際堪移酒
燒竹何人共煮茶
幾度扁舟夢中去
不知塵土在天涯

午門朝見

祥光浮動紫烟收
禁漏初傳午夜籌
乍見扶桑明曉仗

却瞻閭闔覲宸旒一痕斜月雙龍闕百疊春雲五鳳樓
潦倒江湖今白髮可能供奉殿東頭

奉天殿早朝二首

天外鳴鞭肅禁宸朝廷獻納有司存杲恩拂曙樓臺迥
象魏連雲觀闕尊夾陛書思端萬笏上方求諫闕千門
宮牆樹色深於染總受天家雨露恩

其二

月轉蒼龍闕角西建章雲斂玉繩低碧簫雙引鸞聲細

綵扇平分雉尾齊
老幸綴行班
石陞謬慚通籍
預金闈
日高歸院
詞頭下滿袖
天香拆紫泥

雨中放朝出左掖

霏微芳潤浥霓旌
歷落彤墀散履聲
暝色浮烟迷左掖
碧雲將雨近西清
柳垂青瑣千絲重
水落銀橋萬玉鳴
沾灑不辭袍袖濕
天街塵淨馬蹄輕

雪後早朝

月滿長安雪未消
分明銀海瀉秋濤
光迷萬馬瑤珂亂

勢壓雙龍玉闕高曙色漸分鵲觀凝寒猶在鸛鶴袍
負薪亦有號饑者願得君王發漢殿

元旦朝賀

仙音縹緲協和鸞天上春回白玉闌日出雞人徐唱卯
雪消風伯為驅寒萬方玉帛看王會一歲儀文重履端
滿目昇平題不得白頭慚愧直金鑾

進春朝賀

玉殿千官拜冕旒紫衣京兆在前頭四時盛德初臨木

先日嚴寒已送牛氣轉蒼龍當法駕風回明庶動宸遊
聖王和令思行慶次第頒恩下九州

恭候大駕還自南郊

聖主回鑾肅百靈紫雲團蓋翼蒼精屬車劍履星辰麗
先駕旂常日月明十里春風傳警蹕萬方和氣協韶韻
白頭欣覩朝元盛願續思文頌太平

觀駕幸文華聽講

朝下驚興幸講堂徐看天仗轉東廂翠旂拂柳宮牆繞

清蹕穿雲閣道長千載明良真際會九朝文物舊彝章
小臣漫厠夔龍後彷彿還瞻日月光

慶成宴

花映珍盤出上供風吹韶護落遙空坐聯日馭紅雲暖
恩湛宮壺瑞露融一代禮成郊社後百年身際太平中
晚酣不記歸來處彷彿春光玉殿東

再與慶成

日射宮花淑景柔春風重醉殿東頭嫚嫚不厭倡優拙

宣觀親承禮數稠天上露華恩湛湛庭中和氣鹿呦呦
一聲響節驚禽散錦服中官進御羞

實錄成賜燕禮部

北府書成奏尚方南宮拜詔許傳觴青春照坐宮花麗
瑞露浮樽法酒香邂逅鸞臺修故事遂令牛走被餘光
濃恩恰似朝來雨散作槐廳六月涼

臘日賜燕

綺筵錯落映朱旗百辟承恩燕赤墀薦蜡尚存周典禮

賜輔聊舉漢官儀中厨次第催傳觴列坐雍容各覆卮
潦倒不慙書獵字殷勤還賦伐檀詩

端午賜扇

剡藤湘竹巧裁將珍重瑤華出尚方四海清涼初拜賜
一時懷袖總生光最憐明月難捐棄即有仁風可奉揚
真覺自天題處濕墨痕狼籍露華香

賜長壽綵縷

紫宸朝下錫靈絲金水橋邊拜命時文繡自天騰五色

光華約臂結雙螭重慚潦倒隨恩澤還忝班行覩盛儀
願得君王千萬壽日華常照衮衣垂

實錄成蒙恩賜襲衣銀幣

雙銀爛爛出朱提稠疊文繒五色絲天子不遺牛馬走
侍臣還忝鳳凰池青霄寵渥兼金重白首遭逢補衮遲
狼籍天香攜滿袖春風湛露寫新詩

再賜銀幣

流銀嘉幣上方琛晝錫駢蕃雨露深朽質何堪施綺縠

虛名元自愧南金敢忘珍重酬千載圖補絲毫有寸心
白髮茂恩何所自三年供奉忝詞林

翰林齋宿

春星爛漫燭微垣獨擁青綾向夜闌宮漏隔花銀箭永
蓮燈垂燼玉堂寒坐聆宵柝霜圍屋想見郊禋月滿壇
鈴索無風塵土遠始知仙署逼金鑾

興隆寺致齋

漠漠香燈佛座前寢衣相對不成眠明禋夙奉廷中戒

清淨來修物外緣
竹樹湘簾新月色
髻絲禪榻舊風烟
無端忽憶朝元事
笑隔春風又一年

內直有感

天上樓臺白玉堂
白頭來作秘書郎
退朝每傍花枝入
僦直遙聞刻漏長
鈴索蕭閒青瑣靜
詞頭爛漫紫泥香
野人不識瀛洲樂
清夢依然在故鄉

禁中芍藥

仙姿綽約絳羅紳
何日移根傍紫宸
月露冷團金帶重

天風香泛玉堂春
千年想見翻階詠
一笑羞稱近侍臣
不似人間易零落
上方元自隔凡塵

遊西苑

宛轉瀛洲帶幔坡
蜨蜨玉螭壓銀河
廣寒遙見空中樹
太液微生雨後波
雲捲紅粧千步障
鳳吹璫蓋萬年柯
太平見說宸遊簡
馳道青青長薜蘿

秋日再經西苑

內苑秋清宿露晞
盈盈日采動金扉
松間翠殿團華蓋

天外銀橋入紫微
錦纜稀遊青雀暗
璫波無際白鷗飛
彤牆高柳無人折
時見中官一騎歸

西苑詩十首

嘉靖乙酉春同官陳侍講魯南馬修撰仲房王編修
繩武偕余為西苑之遊先是魯南教內書堂識守苑
官因得盡歷諸勝旣歸隨所記憶為詩十篇

萬歲山

日出靈山花霧消
分明員嶠戴金鰲
東來複道浮雲迥

北極觚稜王氣高仙仗乘春觀物化寢園常歲薦櫻桃
青林翠葆深於沐總是天家雨露膏

太液池

泱泱滄池混太清芙蓉十里錦雲平曾聞樂府歌黃鵠
還見秋風動石鯨玉螭蛭蟠垂碧落銀山縹緲自寰瀛
從知鳳輦經遊地鳬雁徊翔總不驚

瑯華島

海上三山擁翠鬟天宮遙在碧雲端古來漫說瑤臺迥

人世寧知玉宇寒
落日芙蓉煙裊裊
秋風桂樹露團團
勝遊寂寞前朝事
誰見吹簫駕綵鸞

承光殿

小苑平臨太液池
金鋪約戶鎖蟠螭
雲中帝座飛華蓋
城上鉤陳繞翠旗
紫氣曾迴雙鳳輦
青松猶有萬年枝
從來清蹕深嚴地
開盡碧桃人未知

龍舟浦

列殿陰陰水竇連
漢家帝子有樓船
蘭橈桂楫曾千里

錦纜牙樯憶往年
汾水秋風空落日
隋隄楊柳漫清煙
今皇別有同民樂
不遣青龍漾碧川

芭蕉園

小山盤折翠嶺岬
松檜陰陰輦道斜
草長蘭亭迷曲水
雨深桃洞自飄花
紫雲依舊圍黃屋
青鳥還應識翠華
知是史臣焚草地
文光隱隱結紅霞

樂成殿

太液東來錦浪平
芙蓉小殿瞰虛明
碧欄蘸影雙龍卧

綠水浮渠九島輕
漾日金鱗堪引釣
拂天翠柳亂聞鶯
激流靜看飛輪轉
天子無為樂歲成

南臺

青林迤邐轉迴塘
南去高臺對苑牆
煖日旌旗春欲動
薰風殿閣晝生涼
別開水榭親魚鳥
下見平田熟稻粱
聖主一遊還一豫
居然清禁有江鄉

兔園

漢王遊息有離宮
瓊闥朱扉迤邐通
別殿春風巢紫鳳

小山飛澗架晴虹
團雲芝蓋翔林表
噴壑龍泉轉地中
簡朴由來堯舜事
故應梁苑不相同

平臺

日上宮牆飛紫埃
先皇閱武有層臺
下方馳道依城盡
東面飛軒映水開
雲傍綺疏常不散
鳥窺仙仗去還來
金華待詔頭都白
欲賦長楊愧不才

丙戌十月十日致仕出京二首

獨驅羸馬出楓宸
回首長安萬斛塵
白髮豈堪供世事

青山自古有閒人
荒餘三徑猶存菊
興落扁舟不為尊
老得一官常卧病
可能勲業上麒麟

其二

白髮蕭疎老秘書
倦遊零落病相如
三年虛索長安米
一日歸乘下澤車
坐對西山朝氣爽
夢回東壁夜牕虛
玉蘭堂下秋風早
幽竹黃花不負余

阻水潞河簡同行黃才伯

長河十月朔風悲
零落貂裘不受吹
冰雪崢嶸驚歲晚

江湖寂寞滯歸期誰憐阮籍窮途泣自笑穰侯見事遲
忽憶同行黃太史篝燈何處擁書帷

丁亥元旦次才伯韻

東風早晚到天涯客子逢春正憶家
栢葉漫傳元旦酒江梅應發故園花
不愁逆旅無親戚依舊江湖有歲華
深負鄭莊騰薦刺遊巖痼疾久煙霞

聞雁有懷

尺書不至意茫茫酒醒俄驚雁北翔
迢遞秋聲連朔漠

蹉跎歸思滿衡湘五更風雨青燈暗萬里江湖白髮長
四海平生幾兄弟年來凌亂不成行

冰泮次才伯韻

吹面東風不作寒斷冰千片下晴灘已知積雪經冬盡
正好垂楊映水看滿目江山勞應接到家櫻笋未闌殘
只應今夜扁舟夢先繞吳門鬪鴨欄

還家志喜

綠樹成陰逕有苔園廬無恙客歸來清朝自是容疎懶

明主何嘗棄不才
林壑豈無投老地
煙霞常護讀書臺
石湖東畔橫塘路
多少山花待我開

玉磬山房

橫牕偃曲帶脩垣
一室都來斗樣寬
誰信曲肱能自樂
我知容膝易為安
春風薙草通幽徑
夜雨編籬護藥欄
笑殺杜陵常寄泊
却思廣廈庇人寒

石湖

石湖煙水望中迷
湖上花深鳥亂啼
芳草自生茶磨嶺

畫橋東注越來溪涼風嫋嫋青蘋末往事悠悠白日西
依舊江波秋月墮傷心莫唱夜烏栖

遊支硎天平諸山

麥隴風微燕子斜雨晴雲日麗江沙遙尋支遁煙中寺
初見天平道上花過眼溪山勞應接方春草樹發光華
夕陽半嶺歸興急慚愧城中自有家

煎茶贈履約

嫩湯自發魚生眼新茗還誇翠展旗穀雨江頭佳節近

惠泉山下小船歸
山人紗帽籠頭處
禪榻風花繞髻飛
酒客不通塵夢醒
卧看春日下松扉

喜雨

弱雲將暝暗松關
急雨蕭然落坐間
山鳥近人呼滑滑
春泉隔屋送潺潺
小牕破睡茶甌淺
別院生涼羽扇閒
滿目新詩題不得
登樓自看郭西山

人日杜氏南樓題贈允勝

城上殘雲爛漫垂
樓頭人日喜晴時
聊從節物占人事

未放春風負酒卮病後光陰新白髮江南消息早梅枝
草堂故事詩篇在應許多情杜甫知

冬日謝克和送鱖

勞遣霜臍到酒邊眼看郭索已垂涎翠螯啄雪真堪把
赤甲含膏更可憐湖上人家收斷後江南風物看燈前
吳中有
看燈蟹居然動我江山興不忘詩人後惠連

春雨漫興

春雨蕭蕭草滿除春風吾亦愛吾廬高情時誦閒居賦

欽定四庫全書

文氏五家集
卷六

老眼能抄種樹書金馬昔年貧曼倩文園今日病相如
焚香燕坐心如水平一任門多長者車

雨後

積雨初收風乍顛城南花事已茫然黃鸝繞樹空千轉
白髮傷春又一年竹几蒲團供坐睡茗杯香鼎有閒緣
客來莫話長安事自理南華外物篇

趙侍御麗卿邀遊冶城

落木蕭蕭帶雨空冶城高處見秋風重將白髮遊江左

依舊青山似洛中有客樽前談夢鹿何人天際慕飛鴻
荒墩寂寞埋秋草猶自風流憶謝公

徒步至寶光寺

布襪青鞋短褐衣酒樽詩卷一僮隨白頭自笑曾供奉
徒步誰憐老拾遺五畝喜聞秔稻熟重陽還恨菊花遲
松寮竹谷逍遙地時有山僧乞小詩

九日與彥明登雨花臺

雨花臺上雨初乾野色江光落坐間豈謂旅遊逢九日

共來把酒對三山老年節物偏生感到處雲林不負閒
落木滿空秋萬里暝禽遙帶夕陽還

靜隱

掃地焚香習燕清蕭然一室謝將迎坐移白日花間影
睡起春禽竹外聲心遠自應人境寂道深殊覺世緣輕
問奇尚有門前客却恨青山不捨名

閒居漫興

深巷無人晝掩扉新晴庭院綠陰肥柳風吹絮河魴上

花雨沾泥海燕飛殘睡未能消卯酒乍暄聊復試春衣
東風綠遍江南草多少王孫怨不歸

夏日睡起

綠陰如水夏堂涼翠簟含風午夢長老去自於閑有得
困來時與客相忘松牕試筆端溪滑石鼎烹雲顧渚香
一鳥不鳴心境寂此身真不愧羲皇

聞蛙

青燈背壁夜微茫閣閣羣蛙正繞堂細雨黃昏貧鼓吹

誰家青草舊池塘年來水旱真難卜我已公私付兩忘
寄語繁聲休強聒吳城明日是端陽

聞雞

乍鳴滄海日東昇再唱長安萬戶醒風雨何曾迷曉漏
霜天還解散疎星誰憐半夜燈前舞常自衝寒馬上聽
此日山牕呼不起壯心回首總凋零

顧華玉邀予為西湖之遊病不能赴詩以謝之

舊約錢塘二十年春風擬放越溪船却憐白髮牽衰病

應是青山欠此緣
漫說西湖天下勝
負他北道主人賢
只餘好夢隨潮去
月落空江萬樹烟

上己日石湖小集

楞伽湖上晚風和
茶磨巖前宿雨過
士女競浮青雀舫
野人自占白鷗波
春來花鳥閒情在
老去山林樂事多
辦取一樽酬令節
扣舷聊和竹枝歌

湛甘泉司馬以詩招遊衡山奉答

家世衡陽有釣臺
江湖流浪未能回
政懷桑梓千年計

忽枉封題萬里來，月滿羅浮勞我夢。
雲埋嶽麓待公開，追攀見說襟懷壯。
倘許春風杖屨陪。

二月念六日遊天池諸山

西北羣山列翠屏，天池宛轉帶支硎。
行穿壑谷身忘倦，忽聽松風酒又醒。
歲閏故應春緩緩，民饑欣見麥青青。
老年行樂知無幾，莫負樽前雙玉瓶。

憶昔四首次陳魯南韻

三年端笏侍明光，潦倒爭看白髮郎。
咫尺常依天北極，

分香曾直殿東廊紫泥泥露封題濕寶墨含風賜扇香
記得退朝歸院靜微吟行過藥欄傍

其二

紫殿東頭敞北扉史臣都著上方衣每懸玉佩聽雞入
曾帶宮花走馬歸此日香鑪違伏枕空吟高閣靄餘輝
三年歸卧滄江上猶記雙龍傍輦飛

其三

扇開青雉兩相宜玉斧分行虎旅隨紫氣氤氳浮象魏

彤光縹緲上罽毼幸依日月瞻龍袞偶際風雲集鳳池
零落江湖儔侶散白頭心事許誰知

其四

一命金華忝制臣山姿偃蹇漫垂紳愧無忠孝酬千載
曾履憂危事一人陞擁春雲嚴虎衛殿開初日照龍鱗
白頭萬事隨湮滅惟有觚稜入夢頻

荆溪道中

荆溪西下小船通離墨銅棺在眼中坐詠風烟懷杜牧

曾穿巖竇識張公
遠山如畫雲開嶂
落日供詩翠滿篷
賸欲躋攀老無力
空餘雙目送飛鴻

人日喜晴有懷故友王履吉

良辰樂事不相違
一笑褰簾喜上眉
浮弄新晴初日色
破除殘臘早梅枝
山林爛漫青樽在
老病侵尋白髮知
不見故人春滿眼
臨風空賦草堂詩

江陰道中賦贈王祿之

春水浮煙柳映空
蘭舟西下兩人同
等閒機事楸枰外

咫尺江山畫笥中一笑頭顱忘我老百年家世與君通
不眠共理平生語落盡燈花月滿蓬

湯子重赴南雍

望望金陵路不遙故人西上木蘭橈春風貰酒丹陽郭
明月題詩白下橋壯志君方事行役暮年吾每戀親交
江城雪後梅花盡無限殷勤在柳條

顧榮夫園池

臨頓東來十畝莊門無車馬有垂楊風流吾愛陶元亮

水竹人推顧辟疆
早歲論交常接席
暮年投社忝同鄉
寄言莫把山扉掩
時擬看花到草堂

榮夫見和再疊

為愛高人水竹莊
幾回繫馬屋邊楊
每開蔣徑延求仲
常伴山公有葛彊
陋巷誰云無轍跡
城居曾不異江鄉
春來見說多幽致
開徧梅花月滿堂

春日雨中

彤閣煙輕翠陸離
曉簾風急雨絲絲
情淹宿酒春愁重

金史四庫全書
卷六
坐弄殘棋畫景遲野色送青山半出煖痕回綠草先知
老來自覺才情減開盡梅花未有詩

人日期與孔周子重小集以事愆期獨坐有懷

草痕簾影碧參差此日逢人有所思樊圃又看挑菜始
江梅剛是試花時喜無冰雪春寒淺況值清明淑景遲
有約不來成寂寞臨風再詠草堂詩

穀日孔周子重祿之南樓小集

靈英初開第八萸玉梅新試兩三英要知春早花期近

喜卜年豐穀旦晴綠醕不教虛節叙白頭聊復話平生
相攜莫便匆匆去新月南樓正自明

伍疇中太守惠酒將過訪

玉川有約到吾廬先遣長鬚致鯉魚老我草玄方寂寞
故人乘興定何如山園夜雨剪春韭花徑春風候小車
青眼交遊無幾在白頭光景莫教虛

齋居漫興

香消古鼎靜沈沈寂寞城居似遠林日上樓臺朝氣爽

燕飛簾幕夏堂深
疎花淨掃風前迹
碧樹新添雨後陰
老覓知音殊意懶
任教塵暗壁間琴

春寒病起

十日春陰一日晴
春衫猶怯曉寒輕
蕭條病骨梅花瘦
宛轉閒愁蔓草生
閉戶新波平野岸
倚樓山色繞江城
東風早晚持樽酒
去聽橫塘滿樹鶯

夏雨

六月飛塵撲面黃
蕭然一雨破驕陽
長風鼓浪翻茅屋

宿霧排雲壓短牆秋事已占南畝喜午眠仍飽北牕涼
登樓別啓西牕看橫卷湘簾一片蒼

袁與之送新茶薦以榮夫新笋賦謝二君

揀芽駢笋薦新泉石鼎沙鐺手自煎一笑月團欣見面
百年玉板更參禪錦舒風籜春雷後翠展雲旗穀雨前
珍重故人披拂意盡驅塵俗破昏眠

秋夜

宿酒微消睡思濃孤懷兀兀夜溶溶半牕涼影雙桐月

一榻秋聲四壁蟲坐閱歲時成老大天教貧病養疎慵
曾參際會無裨補羞更從人說卧龍

九日招孔周諸君

芙蓉波冷桂風涼晤語蕭疎白髮長青眼平生幾親舊
黃花荏苒又重陽越樽久湛金華露吳鱸初肥笠澤霜
擬令羣賢酬一醉呼兒為掃玉蘭堂

宗伯招湯子重遊虎丘

入門連嶺翠峻增別徑穿雲次第登碧瓦參差蓬宇靜

古藤依約紫崖崩眼中歷歷悲前劫
方外悠悠愧老僧
十載同遊半零落長明惟有佛前燈

湯右卿寄十月菊

奕奕秋光照眼新扁舟來自楚江濱
多君珍重黃金贈
老我衰遲白髮新應是晚香同臭味
故教寒艷發清真
誰言已落重陽後十月江南正小春

再遊虎丘

短簿祠前樹鬱蟠生公臺下石孱顏
千年精氣池中劍

一壑風煙寺裏山井冽羽泉茶可試草荒支澗鶴空還
不知清遠詩何處翠蝕苔花細雨斑

三月晦徐少宰同遊虎丘

海湧峯頭宿霧開王珣祠畔少風埃林花落盡春猶在
巖壑無窮客又來水嚙滄池消劍氣雲封白日護經臺
一樽不負探幽興更試三泉覆茗杯

同南充王子正登崑山卧雲閣

時為尹

春雨初晴白玉峯春風冠蓋一尊同使君不負青山約

高會還參白髮翁
煙領夕陽飛鳥背
天圍平野曲欄東
怪來日暮衣裳冷
身在卧雲高閣中

春歸

三月春光積漸微
不須風雨也應歸
與人又作經年別
回首空驚昨夢非
江燕引雛芳草滿
林鶯出谷杏花稀
沈郎別有傷情地
不為題詩減帶圍

詠白燕

高下翩翻雪羽齊
江南社後絮飛時
夢回王謝烏衣盡

舞罷昭陽綰袖垂簾外風輕銀剪剪釵頭春冷玉差差
畫樓霜月傷心處只許張家盼盼知

五月

五月雨晴梅子肥杏花吹盡燕飛飛晴光已到青團扇
士女新裁白苧衣黃鳥故能供寂寞綠陰何必減芳菲
子雲自得幽居樂不恨門前轍跡稀

五月望日登望湖亭

是日微雨作風

木末虛亭瞰碧瀾倒飛天影入憑闌嵐光浮動千峰濕

雨氣薰蒸五月寒石磴躡雲芒履短松風吹雨亭袍寬
狂吟莫怪遲歸去白髮還能幾度看

秋夜

四壁鳴蟲露下餘片雲收雨酒醒初風撩墜葉秋聲早
月印空庭夜色虛衰病不禁時序改蕭閒自與世情疎
若為白首安眠地時有驚塵報羽書

丁未九日與履約諸君同泛石湖就登上方

宿雨初晴水拍天碧雲微斂日華鮮時當黃菊茱萸候

秋在滄洲白鳥邊
柳外畫橋人似蟻
湖心蘭棹酒如泉
攜壺更醉湖山上
白髮重逢又一年

汎湖

春盡南湖碧玉流
故人湖上共夷猶
平橈野渡沿青草
疊鼓中川起白鷗
雲日霏霏梅子雨
風蒲獵獵藕花洲
行春橋外山千疊
盡逐波光上綵舟

是歲閏九月再汎

剛喜重陽臨閏月
不辭老病復登臺
多情秋色依前在

有待籬花故晚開佳節從知難再值青山端不厭重來
畫船記取橫塘路十里笙歌載月回

新夏

暖風庭院草生香晴日簾櫳燕子忙白髮不嫌春事去
綠陰自喜夏堂涼閒心對酒從時換老倦拋書覺晝長
客有相過同一笑竹鑪吹火試旗槍

聞砧

明滅疎燈鑒薄帷誰家擣練夜遲遲驚回短夢千門月

不斷秋風萬里思
歲晚江城還自急
天寒閨閣最先知
高樓人靜星河爛
正是霜華欲下時

自華亭還吳夜泊磧磯

放棹華亭指故園
九峰晴色接吳門
秋風沽酒唐行市
斜日維舟磧磯村
墟落風煙沙渚口
人家燈火竹籬根
機雲踪跡今何處
一望岑山一斷魂

袁魯仲邀登列岫樓

故人湖上有高樓
十載清尊續舊遊
飛翠牕中仍列岫

片帆天際見歸舟依然綠樹啼黃鳥無賴青山笑白頭
不盡阿戎淹戀意渚雲江草兩悠悠

是晚過行春橋翫月再賦

行春橋上月娟娟杜若洲西宿畫船萬鏡不波天在水
四山沈影夜如年已知世事皆身外肯著閒愁到酒邊
宛轉清歌出林表晚煙依約正蒼然

玄墓道中

輕陰駁日水含沙二月江南好物華早辦行輿衝細雨

不教山屐負梅花
烟林滴翠千峰濕
石磴穿雲一徑斜
風泊晚烟寒不散
磬聲遙識梵王家

雨後虎山橋曉望

虎山橋下水交流
正是橋南宿雨收
光福煙開孤剎迥
洞庭波動兩峰浮
已應浩蕩開胸臆
誰識空濛是勝遊
渺渺長風天萬里
眼中殊覺欠扁舟

夏日

永夏茅堂風日嘉
涼陰寂歷樹交加
客來解帶圍新竹

燕起衝簷落晚花
領略清言蒼玉塵
破除沈困紫團茶
六街車馬塵如海
不到柴桑處士家

新秋

秋風昨已到山塘
坐愛閒庭過雨涼
月榭誰家悲玉笛
露桐虛井滴銀牀
病侵肌骨驚寒早
年入衰遲覺夜長
氣候無憑殘暑在
手中紈扇未能忘

八月十四夜對月有懷

月近中秋夜有暉
幽人戀月卧遲遲
及時光景寧須滿

明日陰晴不可期清影一簾金瑣碎涼聲何處玉參差
酒闌無限懷人意都在庭前桂樹枝

十五日

銀漢無聲夜正中十分秋色小樓東空瞻朗月思玄度
誰有高懷似庾公把酒金波浮桂樹捲簾清露滴梧桐
碧雲何處人如玉惆悵東闌一笛風

十六夜

入眼冰輪積漸摧白頭顧影重徘徊極知物理盈當缺

自惜流年去不來
蟋蟀早將寒氣至
芙蓉都受露華開
殷勤不負花前醉
依舊清光在酒杯

小至夜

雲物熙微度曉光
閉關聊復謝迎將
陰陽自與時消息
身世都歸日短長
潦倒已無朝省夢
氤氲空憶殿爐香
向來心事葭灰冷
贏得蕭蕭兩鬢霜

送彭赴嘉興訓導二首

清時一命忝師儒
百里鄰州接里閭
志養於今欣有祿

官貧莫嘆食無魚微名聊足酬初志多暇何妨讀舊書
九十老人須在念頻頻書札問興居

其二

東望嘉禾近百程漫隨儒牒去親庭蟬聯宦業承三世
辛苦傳家有一經我老自憐衰鬢白汝行不失舊繩青
還應別後鍾情處飛夢時時秀水亭

戊午元旦

黃鳥風簷遞好音白頭牕下整冠巾喜聞海上烽烟息

又見人間日月新
霽景騰輝金勝曉
暖痕飛雪玉梅春
何當載酒尋芳去
綠滿郊原草似茵

肇孫北行

阿翁九十苦鍾情
倚杖那堪送汝行
壁水去遊天子學
春風須聽上林鶯
壯途初發千山軻
雅志無忘萬里程
三百年來忠孝在
慎言無潰舊家聲

己未元旦

勞生九十漫隨緣
老病支離幸自全
百歲幾人登耄耄

一身五世見曾玄祗將去日占來日誰謂增年是減年
次第梅花春滿目可容愁到酒樽前

秋夜

新寒高閣夜何其野笛荒砧不斷思澤國變衰菰菜老
長安迎遞帛書遲江空露下芙蓉葉月出風吹桂樹枝
何必潘郎能自省年來青鬢已絲絲

文氏五家集卷六